



Broj: 02-14-2679/19

Velika Kladuša, 05.11.2019. godine

Na osnovu člana 24. Odluke o izvršavanju budžeta Općine Velika Kladuša za 2019. godinu („Službeni glasnik Općine Velika Kladuša”, br. 4/19) i člana 43. Statuta Općine Velika Kladuša („Službeni glasnik Općine Velika Kladuša”, br. 12/11), Općinski načelnik donosi

P R A V I L N I K

o sufinansiranju kapitalnih ulaganja u poljoprivrednoj proizvodnji iz Granta za razvoj poljoprivrede iz Budžeta Općine Velika Kladuša u 2019. godini

Član 1.

Ovim pravilnikom propisuju se uslovi koje moraju ispunjavati pravna lica, obrtnici i fizička lica (u daljem tekstu: kandidati) da bi ostvarili pravo na sufinansiranje kapitalnih ulaganja u poljoprivrednoj proizvodnji u 2019. godini (u daljem tekstu: novčane podrške), uređuju se postupci za njihovo ostvarivanje, načini isplate, plan raspodjele i potrebna dokumentacija.

Član 2.

Za sufinansiranje kapitalnih ulaganja u poljoprivrednoj proizvodnji u 2019. godini na način kako je to regulisano ovim pravilnikom, koristiti će se sredstva u iznosu od 50.000,00 KM iz Budžeta Općine Velika Kladuša, pozicija „Grant za razvoj poljoprivrede“ ekonomski kod 614311-001.

Član 3.

Opći kriteriji za odabir kandidata su slijedeći:

- da je sjedište pravnih lica i obrtnika, odnosno prebivalište fizičkih lica kandidata na području općine Velika Kladuša,
- da kandidat posjeduje zemljište za realizaciju kapitalnog ulaganja ovisno o vrsti ulaganja bilo da je vlasnik istog ili posjeduje Ugovor o zakupu,
- da je obezbijeđeno finansijsko učešće od strane kandidata u definisanim okvirima po pojedinim vrstama proizvodnje,
- da nema dospelih a neizmirenih obaveza prema Općini Velika Kladuša.

Član 4.

Posebni kriteriji za odabir kandidata su slijedeći po vrstama proizvodnje:

4.1. Ulaganje u plasteničku proizvodnju - podizanje novih plastenika površine 100 m²

Zainteresiranim poljoprivrednim proizvođačima za podizanje novih plastenika površine 100 m² sa sistemom za navodnjavanje i cisternom kapaciteta 500 litara uključujući 300 presadnica (paprika i/ili paradajz), ukupne cijene 2.810,00 KM odobravaju se grant sredstva u iznosu od 1.967,00 KM (40%

sufinansira Međunarodni fond za poljoprivredni razvoj i 30% sufinansira Općina Velika Kladuša) uz uslov da obezbijede:

- raspoloživo zemljište na kojem bi se postavio platenik i
- finansijsko učešće u iznosu od 843,00 KM.

Nakon uplate finansijskog učešća od strane odabranog kandidata dobavljaču platenika i dostavljanja kopije uplatnice, izvršit će se uplata grant sredstava odabranom kandidatu u skladu sa Odlukom o odobrenim sredstvima, koja mora proslijediti dobavljaču platenika. Međunarodni fond za razvoj poljoprivrede će 40% učešća doznačiti dobavljaču platenika nakon gore navedenih uplata.

4.2. Ulaganje u podizanje novih zasada koštičavog, jabučastog i jezgrastog voća i kestena

Zainteresiranim poljoprivrednim proizvođačima za podizanje novih zasada koštičavog, jabučastog i jezgrastog voća i kestena odobravaju se grant sredstva u iznosu do 50% od iznosa plaćenog za kupovinu sadnog materijala onima koji su već podigli zasade od jeseni 2018. godine i u toku 2019. godine i to:

- površina zasada iznosi minimalno 1 dunum do maksimalno 20 dunuma,
- broj sadnica po jednom dunumu iznosi kako slijedi: min 120 sadnica jabuka, dunja, krušaka, min. 50 sadnica šljiva, lijeske, trešnje, višnje, min. 10 sadnica oraħa sijanca, min. 15 oraħa kalemljenog i min. 10 sadnica kestena,
- sadnice nabavljene od registrovanog proizvođača sadnog materijala ili preduzeća/zadruge registrovanih za promet sadnim materijalom.

4.3. Ulaganje u osnovna sredstva registriranih zadruga i poljoprivrednih obrta i pravnih lica u toku 2019. godine

Zainteresiranim kandidatima za ulaganje u osnovna sredstva registriranih zadruga i poljoprivrednih obrta i pravnih lica u 2019. godini odobravaju se grant sredstva u iznosu maksimalno do 70% od iznosa plaćenog za nabavku osnovnih sredstava u tekućoj godini.

Član 5.

Za ostvarivanje prava na grant sredstva zainteresirani kandidati podnose zahtjev Službi za poduzetništvo, lokalni razvoj i implementaciju projekata uz koji prilažu slijedeću dokumentaciju:

5.1. za tačku 4.1. potrebno je priložiti:

- original ili ovjerenu kopiju uvjerenja o prebivalištu
- original ili ovjerenu kopiju posjedovnog lista/ZK izvatka na ime kandidata/člana uže porodice ili Ugovor o zakupu zemljišta
- original ovjerenu izjavu kandidata o finansijskom učešću u iznosu 780,00 KM.

5.2. za tačku 4.2. potrebno je priložiti:

- original ili ovjerenu kopiju uvjerenja o prebivalištu ili rješenja o registraciji
- original ili ovjerenu kopiju posjedovnog lista/ZK izvatka na ime/naziv kandidata ili Ugovor o zakupu zemljišta za površinu na kojoj je podignut zasad
- original ili ovjerenu kopiju fiskalnog računa od registrovanog proizvođača sadnog materijala ili preduzeća/zadruge registrovanih za promet sadnim materijalom koji datira iz perioda jesen 2018. godina i u toku 2019. godine
- original ili ovjerenu kopiju deklaracije o kvalitetu sadnog materijala izdatu od proizvođača sadnog materijala
- original ili ovjerenu kopiju pedološke analizu tla.

5.3. za tačku 4.3. potrebno je priložiti:

- original ili ovjerenu kopiju rješenja o registraciji
- original ili ovjerenu kopiju računa kojim se dokumentuje nabavka osnovnih sredstava
- original ili ovjerenu kopiju dokaza o izvršenoj uplati po ispostavljenom računu.

Član 6.

Provjera i utvrđivanje eventualnih obaveza, odnosno dugovanja prema Općini Velika Kladuša će se vršiti po službenoj dužnosti.

Član 7.

Za raspodjelu sredstava definisanih ovim pravilnikom objavit će se Javni poziv koji će biti otvoren do 29. novembra 2019. godine a biće objavljen na Oglasnoj ploči i službenoj internet stranici Općine Velika Kladuša. Javnim pozivom će detaljnije biti definisan zahtjev za prijavu na Javni poziv sa popisom potrebne dokumentacije.

Član 8.

Za rangiranje i odabir potencijalnih korisnika sredstava, Općinski načelnik će imenovati Komisiju za dodjelu grant sredstava za kapitalna ulaganja.

Zadatak Komisije je da izvrši pregled prispjelih prijava, evidentira potencijalne korisnike koji ispunjavaju uslove iz ovog pravilnika, obavi uviđaj na licu mjesta, sačini listu korisnika i istu dostavi Općinskom načelniku. Konačnu odluku o visini odobrenih grant sredstava donosi Općinski načelnik kojom odobrava isplatu. Potpisana Odluka sa pratećim spiskovima proslijedit će se Službi za finansije, računovodstvo i javne nabavke radi isplate.

Član 9.

Za realizaciju ovog pravilnika zadužuju se Služba za privredu i upravljanje integriranim razvojem i Služba za finansije i računovodstvo Općine Velika Kladuša, koje će nakon završene realizacije sačiniti konačnu informaciju o namjenskom korištenju sredstava.

Član 10.

Ukoliko nakon obrade pristiglih zahtjeva i sačinjenih spiskova potencijalnih korisnika sredstava premaši se iznos planiranih sredstava ili ostane neiskorišten dio sredstava planiranih ovim pravilnikom i Grantom za razvoj poljoprivrede predviđen Budžetom Općine Velika Kladuša za 2019. godinu isti će se prerasporediti u skladu sa izmjenama i dopunama ovog pravilnika.

Član 11.

Ovaj pravilnik stupa na snagu danom donošenja a objavit će se u „Službenom glasniku Općine Velika Kladuša“.

Dostavljeno:

1. Kabinet Općinskog načelnika
2. Službi za upravu, društvene djelatnosti i zajedničke poslove
3. Službi za finansije, računovodstvo i javne nabavke
4. u spis
5. a/a

